



Stručna služba općinskog vijeća i općinskog načelnika

Broj: 01/1-02-1474/18

**PRIJEDLOG**

Ilijaš, 28.06.2018. godine

### **Z A P I S N I K**

sa 21. (dvadesetprve) sjednice Općinskog vijeća Ilijaš, održane dana 28.06.2018. godine, sa početkom u 10:00h.

Dvadesetprvom sjednicom Općinskog vijeća Ilijaš predsjedavao je zamjenik predsjedavajućeg g-din Alen Hasković.

Prisutni vijećnici:

<b>RB.</b>	<b>IME I PREZIME</b>
	<b>SDA</b>
1	MAHIR DEVIĆ
2	ANEL BUMBULOVIĆ
3	MUAMER DERVIŠEVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	FAHIR HASANOVIĆ
8	ARMIN MATORUGA
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	SEAD ŠEHIĆ
	<b>SDP</b>
15	ALAN ŠERAK
16	-
17	-
	<b>SBB-FAHRUDIN RADONČIĆ</b>
18	AKIF BEŠLIJA
	<b>BPS-SEFER HALILOVIĆ</b>
19	MUHAMED HANDŽIĆ
20	ALMIR ŠPIODIĆ
	<b>GS</b>
21	EDHEM HASANOVIĆ
22	ASIM MUJIĆ
	<b>SAMOSTALNI VIJEĆNIK</b>
23	SEMIR DIZDAREVIĆ
	<b>LDS</b>
24	MEHO DŽINDO
	<b>STRANKA ZA SREDNJE</b>
25	-

Odsutni vijećnici:

1. Damir Filipović
2. Mirsad Osmanović i
3. Besim Gljiva.

Prisutni gosti:

1. Aida Muratović – Radio Ilijaš
2. TV SA
3. Mehmed Smajlović – predsjednik Savjeta MZ Mrakovo
4. Meho Mešetović – predsjednik Savjeta MZ Ilijaš Grad
5. Alen Matoruga – predsjednik Savjeta MZ Misoča
6. Volonteri: Nejra Ćosić i Salkuna Salihović

Ostali prisutni:

1. Akif Fazlić – općinski načelnik
2. Meliha Avdibegović – pomoćnik načelnika
3. Sanja Zagorac-Jozić – pomoćnik načelnika
4. Sadeta Brkić – pomoćnik načelnika
5. Nijaz Spahić – pomoćnik načelnika
6. Zdravko Barić – pomoćnik načelnika
7. Aziz Fazlić – pomoćnik načelnika
8. Ilda Kahriman – sekretar OV-a Ilijaš
9. Nermina Avdukić – stručni saradnik za informacije
10. Maida Habibović – zapisničar

ALEN HASKOVIĆ – zamjenik predsjedavajućeg

Otvorio je sjednicu i konstatovao da je prisutno 22 vijećnika.  
Zatim je dao na razmatranje zapisnik sa 20. sjednice OV-a.

Primjedbi na zapisnik nije bilo, pa je Općinsko vijeće jednoglasno usvojilo zapisnik sa 20. sjednice OV-a Ilijaš.

Pročitao je predloženi dnevni red i naglasio da postoji prijedlog za dopunu dnevnog reda, te pozvao predsjednika Komisije za izbor i imenovanja da obrazloži navedeni prijedlog dopune dnevnog reda.

RASIM ŠEHIĆ – predsjednik Komisije za izbor i imenovanja

Predlažem shodno Statutu općine Ilijaš, da ovo u samoj tački razmotrite rješenje o izboru člana Komisije za izbor i imenovanje i rješenje o razrješenju člana Komisije za izbor i imenovanje. Također, rješenje se odnosi i na izbor i razrješenje člana Komisije za administrativne poslove, budžet, privredu, finansije i ekonomska pitanja. Kolegi Saudinu Durmiću, prestankom mandatne dužnosti, prestalo je i njegovo pravo da bude u Komisiji za izbor i imenovanja, jer u tu Komisiju dolazi član iz reda vijećnika. Shodno tome, razrješuje se vijećnik kojem je prestala mandatna dužnost Saudin Durmić, imenuje se Dedić Semir. Također, Enisa Mešetović član Komisije za administrativne poslove, budžet, privredu, finansije i ekonomska pitanja, zbog nespojivosti funkcija sada je zasnovala radni odnos kao državni službenik i na njeno ime se imenuje, odnosno daje se prijedlog Udovčić Mirnes.

Primjedbi i prijedloga za dopunu dnevnog reda više nije bilo, pa je OV-e jednoglasno usvojilo sljedeći

## **DNEVNI RED**

1. Vijećnička pitanja i inicijative
2. Izvještaj o realizaciji zaključaka sa 20. sjednice
3. Prijedlog Odluke o pristupanju izradi Regulacionog plana "Srebrenički arboretum"
4. Prijedlog rješenja o:
  - a) razrješenju člana Komisije za administrativne poslove, budžet, privredu, finansije i ekonomska pitanja Enise Mešetović
  - b) izboru člana Komisije za administrativne poslove, budžet, privredu, finansije i ekonomska pitanja Mirnesa Udovčić
  - c) razrješenju člana Komisije za izbor i imenovanja Saudina Durmića
  - d) izboru člana Komisije za izbor i imenovanja Semira Dedića
5. Prijedlog Odluke o prodaji neizgrađenog građevinskog zemljišta neposrednom pogodbom
6. Prijedlog rješenja iz imovinsko-pravne oblasti broj:06/1-31-1086/17 od 21.06.2018. godine.

### **AD-1**

#### **Vijećnička pitanja i inicijative**

**MUHAMED HANDŽIĆ – vijećnik BPS-Sefer Halilović**

Dobio sam odgovor na moje pitanje sa prethodne sjednice OV-a od službe koja nije nadležna za to, a ja nisam tražio odgovor od službe.

Pitanje se odnosilo na rekonstrukciju puta u Donjoj Luci, tačnije od podvožnjaka do Biočkog mosta. Dionica puta je skoro uništena. To pitanje sam postavio Direkciji za puteve Kantona Sarajevo. Međutim, od općinske službe sam dobio odgovor da Direkcija za puteve Kantona Sarajevo radi po svom planu i taj je odgovor, po meni, ponižava za vijećnika. Ja to znam odlično i znam šta Direkcija za puteve treba da radi, znam kakve su njihove nadležnosti, a znam isto kakve su nadležnosti naše općinske službe. Prema tome, nemojte se upuštati da meni dajete ovakve odgovore, jer to ne zaslužujem.

Dakle, ponovo postavljam:

Pitanje:

Kada će Direkcija za puteve Kantona Sarajevo vršiti rekonstrukciju Regionalnog puta Stari Ilijaš – Bioča – Ahatovići i to na dionici od podvožnjaka u naselju Luka (ispod auto puta) do Biočkog mosta na rijeci Bosni.

**OBRAZLOŽENJE:** Navedena dionica puta je u velikoj mjeri uništena i njena upotreba je gotovo pa nemoguća. Veći dio ove dionice je sužen na 2,5 metara širine, a zbog nasipa koji su postavljeni uz korito rijeke Bosne radi poplava, dok su udarne rupe na istoj u tolikoj mjeri da se ne mogu ni zaobići.

**NAPOMENA:** Zahtjevam da se ovo moje pitanje uputi Direkciji za puteve Kantona Sarajevo od kojih očekujem i odgovor na isto.

Drugo, mi smo u proteklom mjesecu izgubili jednog vrlo bitnog čovjeka za općinu Ilijaš. Prisustvovali smo skoro svi na njegovoj dženazi, ali mislim da smo, kao Vijeće, napravili

jedan propust, a u pitanju je komandant Meho Mešetović, koji je dao veliki doprinos kako u odbrani Ilijaša i BiH, tako i u društveno, političkom životu.

Mislim da smo napravili propust u smislu organizovanja komemorativne sjednice ili eventulano otvaranje knjige žalosti. Ne želim ovo nikome inputirati, ali volio bih da nam se ovakve stvari u budućnosti ne dešavaju. Meho i svi ljudi koji su dali doprinos za općinu Ilijaš, treba da se poštuju i nakon njihove smrti i treba im odati počast na jedan ljudski način kako bi to trebalo da provode sve općine. Na kraju, krajeva on i njegova porodica su to zaslužili.

MAHIR DEVIĆ – predsjedavajući

U funkciji predsjedavajućeg, nama je ovo prvi put da se susrećemo sa nečim ovakvim. Ovo što je rekao Muhamed, ja uvažavam i napravili smo neku vrstu propusta šta je trebalo organizirati, ali do sada nismo imali ovakvu vrstu iskustava. Ako možemo nešto naknadno uraditi, kao Vijeće, da to uradimo. Možda bi bilo dobro da se na neki način obratimo i boračkim udruženjima i svima drugima kako bi napravili određeni spisak ljudi relevantnih, važnih ljudi za općinu Ilijaš po svim segmentima društveno političkog djelovanja i da taj spisak imamo u Službi za opću upravu, boračko-invalidsku i socijalnu zaštitu. Dženazi smo prisustvovali skoro svi, ali smo kao Vijeće možda mogli nešto organizovati, ali smo možda očekivali od boračkih udruženja, a oni od nas. Ne prebacujem odgovornost ni na koga, ali možda da krenemo od neke vrste inicijative da vidimo ko su to bili naši komandanti, do kog nivoa i ko su ti ljudi koji su dali veliki doprinos i u slučaju njihove smrti, da mi kao Vijeće znamo i imamo taj spisak i organiziramo to što treba. U neko narednom periodu u saradnji sa pomoćnikom načelnika sa boračko-invalidsku zaštitu da vidimo da nešto osmislimo po ovom pitanju. Ako sada nije kasno da nešto uradimo, ne bježim od toga da održimo komemorativnu ili tematsku sjednicu možda kada se se navršši četrdeset dana od smrti Mehe Mešetovića.

Dajte neki prijedlog.

MUHAMED HANDŽIĆ – vijećnik BPS-Sefer Halilović

Mi, kao Vijeće, imenovali smo Komisiju za boračka pitanja. Ta Komisija, ako služi svrsi samo da smo je imenovali, onda je to sramno. Oni su, prije svega, trebali zahtijevati od boračkih udruženja da im dostave te spiskove o kojima govorite. Za nas starije, koji smo bili u ratu i šta sve nismo pretrpjeli i iznijeli na svojim "leđima", a i vi mlađi, kao dječaci, koji ste bili pored nas i sve to preživjeli, je malo ponižavajuće i to boli puno. Kad god izgubim kojeg kolegu, to doživljavam kao da sam izgubio rođenog brata. Ovo govorim emotivno, ali je bitno da mi natjeramo Komisiju za boračka pitanja zajedno sa boračkim udruženjima da se aktivnije uključe u ovom. Svi znamo da su oni pasivni, a o boračkim udruženjima ja više ne želim pričati, jer je dovoljno rečeno o njima čime se oni bave i šta im je osnovna misija, ali mi ćemo ih morati natjerati da se bave poslom koji mi ne želimo zaboraviti. Kada "neki tamo" slave svoje ratne zločince i obilježavaju svaki njihov dan možemo i mi obilježiti dan kada je naš komandat umro, na jedan dostojansven način.

Ja ovdje prebacujem odgovornost isključivo na Komisiju za boračka pitanja zajedno sa boračkim udruženjima.

MAHIR DEVIĆ – predsjedavajući

Možda da usvojimo zaključak da kada bude četrdeset dana od smrti komandanta Mehe, da se organizuje komemorativna sjednica gdje će se govoriti o njegovom učešću u proteklom ratu.

AKIF FAZLIĆ – općinski načelnik

Ovo je vrlo osjetljivo pitanje i ja ne bih da mi danas kažemo šta hoćemo. Mislim da je puno važnije da definišemo šta ćemo ubuduće raditi i kako raditi. Uz sve ovo što je Muhamed kazao, ipak treba kazati da je bilo određene reakcije i možda je ona bila spontana i u tome i jest problem. Ipak su povučeni potezi da se na jedan dostojanstven način obavi dženaza, ali to nije to i Muhamed je upravu. Mi, prije svega, trebamo izdefinisati kako ćemo u tim slučajevima reagovati, protokolarno i na svaki drugi način to provesti. Moramo znati koje su to funkcije kada se saziva komemorativna sjednica. Dakle, trebalo bi to uobličiti u akt koji će to sve definisati i po tome raditi.

Dakle, lično nisam za to da sada poslije svega nešto radimo.

MAHIR DEVIĆ – predsjedavajući

Predlažem da zaključkom OV-a zadužimo Službu za opću upravu, boračko-invalidsku i socijalnu zaštitu općine Ilijaš da pripremi relevantan spisak na osnovu, određene metodologije, koji su to ljudi i do kojeg nivoa treba, u slučaju smrti, da se organizira komemorativna sjednica od strane Općinskog vijeća Ilijaš.

Drugo, evo da se dogovorimo ili da bude inicijativa da kada bude godišnjica smrti komandanta Mehe Mešetovića da se organizira određena vrsta obilježavanja u koordinaciji Komisije za boračka pitanja i Općinskog vijeća.

AKIF BEŠLIJA – vijećnik SBB-a

Zaključak je dobar, ali možda da iskoristimo priliku, obzirom da je uskoro Dan 126. Ilijaške brigade kojoj je bio komandant Meho Mešetović, da poslije njihovog programa održimo tematsku sjednicu.

MAHIR DEVIĆ – predsjedavajući

Nemamo vremena i prostora da to uradimo u ovako kratkom vremenu.

ALEN HASKOVIĆ – zamjenik predsjedavajućeg

Dao je na glasanje prijedlog zaključka Mahira Devića.

Općinsko vijeće je jednoglasno donijelo

## ZAKLJUČAK

Zadužuje se Služba za opću upravu, boračko-invalidsku i socijalnu zaštitu općine Ilijaš da pripremi relevantan spisak na osnovu, određene metodologije, koji su to ljudi i do kojeg nivoa treba, u slučaju smrti, da se organizira komemorativna sjednica od strane Općinskog

vijeća Ilijaš.

HALID DIZDAREVIĆ – vijećnik SDA

Inicijativa:

1. Ovu inicijativu pokrećem prema BH Telecom d.d. u cilju da se utvrdi stanje njihove infrastrukture, pošto mnogi građani sa područja Mjesne zajednice Gajevi i Mjesne zajednice Dragoradi duži vremenski period izražavaju nezadovoljstvo pružanjem usluga BH Telecom d.d. pogotovo Internet paketa.

Predlažem da se ova inicijativa usvoji u vidu zaključka.

Općinsko vijeće je jednoglasno usvojilo

### ZAKLJUČAK

Kojim se traži od BH TELECOM-a da provjeri stanje infrastrukture u smislu pružanja Internet usluga na području Mjesne zajednice Gajevi i Mjesne zajednice Dragoradi, kako bi preispitali i poboljšali kvalitet usluga, te iste doveli na zadovoljavajući nivo.

ALMIR ŠPIODIĆ – vijećnik BPS-Sefer Halilović

Pitanje:

1. Koja je svrha postavljanja svjetlosne signalizacije na pružnom prelazu Alića rampe? Jesu li zaista potrebni semafori baš na toj dionici i kako će se regulisati drumski i željeznički saobraćaj u isto vrijeme, a poznato je da Željeznice nemaju tačan red vožnje?
2. Koje su konkretno mjere poduzeli u skladu sa Odlukom o prokopavanju javnih površina na Kantonu Sarajevo općinskin inspektor i nadzor nad radovima koje provodi BH-Telecom na lokalitetu Podlugovi? Da li su sačinili zapisnik, evidentirali problem, procijenili štetu i kad će se izvršiti sanacija navedenih problema? Tražim da mi se dostavi kopija zapisnika.

Još u 2017. godini kroz jednu inicijativu tražio sam od Ministarstva saobraćaja Kantona Sarajevo i nadležne općinske službe da se izvrši postavljanje odgovarajuće saobraćajne signalizacije u užem dijelu grada Ilijaša, tačnije na rješavanju raskrsnice kod policijske stanice, jer se na ovoj raskrsnici vrlo često dešavaju saobraćajne nesreće.

Inicijativa:

Pokrećem ponovno inicijativu da Ministarstvo saobraćaja Kantona Sarajevo u saradnji sa nadležnom općinskom službom iznađe najbolje rješenje za raskrsnicu kod policijske stanice kako bi se smanjio broj saobraćajnih nesreća u našem gradu.

Nadam se jednom konstruktivnom odgovoru, jer ste mi na prošlu inicijativu to uskratili.

SEAD ŠEHIĆ – vijećnik SDA

Na prošloj sjednici OV-a postavio sam pitanje koje se odnosilo na područje Novog Naselja gdje se više od godinu dana nalaze dvije velike udarne rupe. Dobio sam odgovor da će

općinska inspekcija izvršiti provjeru na terenu i naložiti nadležnim organima da riješe otklanjanje nedostataka. Nasut je tampon, ali usljed obilnih padavina ponovo su se pojavili krateri, a saobraćaj je frekventan i ulice su veoma uske.

Zamolio bih i apelirao na načelnika i sve nadležne da se to završi, asfaltira.

ANEL BUMBULOVIĆ – vijećnik SDA

MEHMED SINANOVIĆ – vijećnik SDA

Pitanje:

S obzirom na konstatantne probleme i pritužbe građana opštine Ilijaš na atmosferska pražnjenja u neposrednoj blizini kao i epicentru kablovske mreže, a to ima za posljedicu uništavanje i kvarove na kućnim električnim uređajima i aparatima, priključcima na Telemach mrežu.

S obzirom na gore navedeno, postavlja se pitanje da li kablovska mreža Telemach ima adekvatnu zaštitu od prenapona usljed atmosferskih pražnjenja u stubove na kojima je instalirana navedena mreža. Molio bih objašnjenje ko je odgovoran za nastale kvarove i ko bih stanovništvu mogao nadoknaditi nastalu štetu. Moramo još napomenuti da informacije sa terena govore da većina stubova na kojima se nalazi navedena mreža nema adekvatnu zaštitu i uzemljenje.

Pitanje proslijediti kablovskom operateru Telemach.

#### AD-2

Izveštaj o realizaciji zaključaka sa 20. sjednice

Zamjenik predsjedavajućeg je konstatovao da nije bilo zaključaka na 20. sjednici.

#### AD-3

Prijedlog Odluke o pristupanju izradi Regulacionog plana "Srebrenički arboretum"

MELIHA AVDIBEGOVIĆ – pomoćnik načelnika

Do sada smo imali dosta Regulacionih planova koje smo mi donosili i u vašem sazivu, bit će ih još i jedna smo od općina koja vlastitim sredstvima donosi ove Regulacione planove, što je preduslov planskog uređenja prostora. Ovo je po meni jedan različit plan i značajan po svim segmentima, kako urbanistički, arhitektonski tako i historijski. Izradom i donošenjem ovog plana i izgradnjom sadržaja na planiranom prostoru, trajno će sve nas podsjećati na genocid koji se desio u Srebrenici 1995. godine. Bit će izgrađen prostor sjećanja na sve one koji su poginuli i nastradali, ali i trajna opomena na ovom području svima nama da se to nikada više ne desi. Lokalitet obuhvata plana nalazi se na lokaciji Karašnica, na lokalitetu oko započete izgradnje spomenika cvijet Srebrenica, u površini 6,5 hektara. Cilj izrade Plana jeste da se na lokalitetu Karašnica na zemljištu, na kojima je započeta izgradnja spomenika cvijet Srebrenice, obezbijedi planska osnova za kvalitetno uređenje prostora kao javne pejzažno-oblikovne površine na način planiranja i formiranja novog prostora, važan za gradski identitet, primjereno poruci i sjećanju na genocid koji se dogodio u Srebrenici. Prostor je najvećim dijelom neizgrađena površina, smještena na padini nagiba do 25%, okrenut prema Ilijašu i Podlugovima. Područje sjajnih vizura, što

ovu topografsku cjelinu čini iznimno važnim planerskim i projektanskim polazištem u planiranju i projektovanju građevina i površina. Velikim dijelom područje čine padine sa autohtonim rastinjem, isto nije opremljena komunalnom infrastrukturom a moguć pristup je sa nekategorisanih puteva, sa tri strane. Planirano je da se Plan radi sa sljedećim usmjerenjima, planirati uređenu pejzažno-oblikovnu cjelinu s ciljem stvaranja novog identiteta prostora usklađenog i prepoznatljivog ambijenta, uz započetu izgradnju Srebreničkog cvijeta sa centralnom pozicijom. Ovaj prostor treba smatrati prirodnim vrijednostima i istu treba da čini biološka komponenta, karakteristične vegetacijske jedinice ciljem dobivanja povoljnih ekoloških, ali i vizualno estetskih efekata. Područje planirati kao prepoznatljiv prostor sa vidljivom i jasnom porukom vezanom za sjećanje na nastradale u Srebrenici. Planirano je da se kroz kompozicijsko pejzažno oblikovno prostorne elemente planiraju površine, okupljanja radi sjećanja na žrtve Srebreničkog genocida, održavanja kulturnih događaja, časova u prirodi i slično. Definisanje vegetacijskih elemenata kako sa aspekta pejzažno-oblikovnih, tako i sa aspekta zaštite lokaliteta. Izgradnja pješačkih staza koje treba da se trasiraju u skladu sa karakteristikama terena, vizurnim tačkama, sa manjim odmorištima, svi sadržaji koji se planiraju, moraju biti kompatibilni sa osnovnom porukom ovog lokaliteta, a to su Srebrenički cvijet, predložiti uređenje sa prijedlogom lociranja i spomen ploče, amfiteatar ljetna pozornica na otvorenom, vidikovac, restoran locirati na lokaciji koja obezbjeđuje vizure, panoramski pogled na kotlinu Ilijaša, maksimalne spratnosti 5+1, arhitekturom i primjenom materijala usklađen sa ambijentom i lokalnim uvjetima. Šetnice sa mjestima za sjedenje, slobodne, uređene zelene površine sa urbanom opremom, klupe, fontane, česme za piće, informacioni panoi i slično. Razmotriti mogućnost trasiranja biciklističkih staza i punktova za igru djece u obimu i na način da se ne naruši osnovna ideja i motiv realizacije Srebreničkog cvijeta. Utvrditi pravce ulaza u područje, uspostaviti komitet kretanja posjetitelja sa preciziranim ulazima koje vode do određenih ciljnih tačaka, te razmotriti potrebu ograđivanja područja, sadnju visokog drveća, vodeći računa o položaju Srebreničkog cvijeta i potrebu za obezbjeđenjem kvalitetnih vizura. U toku izrade Plana, potrebno je zadržati koncept planirane saobraćajne mreže, definisano Planom višeg reda, a interni saobraćaj planirati sa saobraćajnicama ne manjim od 6 m za dvosmjerni motorni saobraćaj ili 4,5 m za jednosmjerni motorni saobraćaj. Prilagoditi namjeni sa prijedlogom ograničenja pristupa automobila na određene cjeline prostora. Rok za isporuku Plana je decembar 2019. godine, a sredstva u iznosu od 37.500 KM obezbjeđuje općina Ilijaš. Kontakt sa javnošću će se održati više puta, na koncept nacrt i prijedlog Plana o čemu će javnost biti na vrijeme obavještena. Komisije nisu imale primjedbi na ovu Odluku, te predlažem Vijeću da usvoji ovu Odluku.

ALMA OMEROVIĆ – vijećnik SDA

Imam potrebu da pohvalim Regulacioni plan za Srebrenički arboretum, mislim da ćemo ovim projektom dobiti zaista jedan izuzetno originalan prostor, od samog cvijeta pa sve ostalo što prati ovaj Regulacioni plan, tako da ćemo na jedan vrlo dostojanstven način moći obilježavati godišnjicu genocida u Srebrenici. Iskoristila bih ovu priliku da vas u ime Organizacionog odbora, sve kolege pozovem da propratimo aktivnosti koje će biti upriličene u toku ove godišnjice obilježavanja. Svakako tu je i obilazak Srebreničkog arboretuma, isti dan bit će upriličena i akademija, 9.jula bit će ispraćaj konvoja odnosno posmrtnih ostataka u 10:30 h. U 19:00 h bit će održana Akademija u kino Sali KSC-a Ilijaš, pa vas pozivam da prisustvujete.

HALID DIZDAREVIĆ – vijećnik SDA

Ja se također pridružujem pohvalama i ovdje se vidjelo da se išlo do svih detalja koji su neophodni da se jedan ovakav projekat realizuje i ja ovom prilikom pozivam građane, koji su tu u blizini da kroz ovaj Nacrt i Prijedlog ovog Regulacionog plana učestvuju, jer oni i graniče u tom dijelu sa ovom odlukom o pristupanju izrade Regulacionog plana.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Odluku o pristupanju izradi Regulacionog plana "Srebrenički arboretum"

#### AD-4

Prijedlog rješenja o:

- a) razrješenju člana Komisije za administrativne poslove, budžet, privredu, finansije i ekonomska pitanja Enise Mešetović
- b) izboru člana Komisije za administrativne poslove, budžet, privredu, finansije i ekonomska pitanja Mirnesa Udovčić
- c) razrješenju člana Komisije za izbor i imenovanja Saudina Durmića
- d) izboru člana Komisije za izbor i imenovanja Semira Dedića

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Rješenja o:

- a) razrješenju člana Komisije za administrativne poslove, budžet, privredu, finansije i ekonomska pitanja Enise Mešetović
- b) izboru člana Komisije za administrativne poslove, budžet, privredu, finansije i ekonomska pitanja Mirnesa Udovčić
- c) razrješenju člana Komisije za izbor i imenovanja Saudina Durmića
- d) izboru člana Komisije za izbor i imenovanja Semira Dedića

#### AD-5

Prijedlog Odluke o prodaji neizgrađenog građevinskog zemljišta neposrednom pogodbom

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Odluku o prodaji neizgrađenog građevinskog zemljišta neposrednom pogodbom

#### AD-6

Prijedlog rješenja iz imovinsko-pravne oblasti broj:06/1-31-1086/17 od 21.06.2018. godine

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Rješenja iz imovinsko-pravne oblasti broj:06/1-31-1086/17 od 21.06.2018.  
godine

ALEN HASKOVIĆ – zamjenik predsjedavajućeg

Želim da vas pozovem na program obilježavanja Dana 126. Ilijaške brigade Ilijaš u 2018. godini. Dana 01.07.2018. godine u 19:00 h planirano je polaganje cvijeća na Centralnom spomen obilježju šehidima i poginulim borcima u Ilijašu. U 19:15 h, Svečana akademija u povodu 25 godina od formiranja 126. Ilijaške brigade, plato ispred KSC-a Ilijaš. Zamolit ću sve vijećnike da se u skladu sa svojim mogućnostima odazovu na ovaj program.

Nakon što je iscrpljen dnevni red, zamjenik predsjedavajućeg Alen Hasković zaključio je dvadeset prvu sjednicu OV-a Ilijaš u 10:55h.

Zapisničar:  
Maida Habibović

PREDSJEDAVAJUĆI  
OPĆINSKOG VIJEĆA ILIJAŠ

---

Mahir Dević, prof.

\*\*\*\*\*

Ul. 126. Ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:1602000000710645  
e-mail [ov@ilijas.ba](mailto:ov@ilijas.ba)  
Broj certifikata:20938

